

榆次縣志後序

贊纂述縣志既竟距今已十餘年矣回憶纂志之初家紱章

先生總其成同人分門纂述迄丁卯紱章先生之卒僅有馬君炳宸之述水利楊君漢臣之述生計成篇贊方商討先民

著述及邑金石方言俱未之就也既同人以志事見委自維學識遠不敢企紱章先生乃定為斷自續志之後而前志槩從補正頗為同人所見許於是廣徵訪稿加以分合刪訂乘授課之餘寒暑之暇勉為編輯迨甲戌歲始得粗就而田賦至丙子歲趙君壽祺亦成篇嗚呼羣材羣力之合於以成書自非鴻碩詎云勝任戴東原氏世稱博洽而汾州府志之成

榆次縣志

後序

常序

一

章實齋譏彈於前賈書農訂補於後贊之疏陋更不敢希風

萬一然金以受冶而始精玉以頻琢而成器所望邑中績學後進良材加以補遺勘謬耿耿此心期之不易者也竊見司

馬子長之史記班孟堅之漢書末卷自序及叙傳並揚先人懿行且明著書之由贊曩任山西文獻徵存局編纂嘗乞沁

水賈書農師撰先大夫事略丁卯存諸家乘前歲山西獻徵之印悉出贊所撰述不敢妄羸茲竊比馬班前軌而錄存後

序以謝夫各私其親之嫌抑猶山西獻徵之悵也事略云先生諱立仁字慈圃號雨峯榆次縣人幼讀書強記為同塾冠母患急疾太谷有良藥距所居十數里先生年十二與弟立

義携手急馳臘雪載途野無行人購藥歸母疾亦尋愈叔佶綜理商務事恆在外先生再應童試未售念父年垂暮肩家政遂棄舉業任家事且隨叔營商業也未幾叔逝世先生繼任事終歲居肆中得悉其情弊歸家事親督諸弟讀曰余讀書不成諸弟無以家為慮務以讀書大門閭也弟卒婦賈矢苦節先生敬禮有加無稍忤同治甲戌父卒先生蔬食百日不出房闥葬畢營商事如初而責耕穫畫家計均有條理恆如所期光緒辛巳堂弟立智故以諸生食餼舉優行有文譽工書法以慟母發狂卒先生悼其孤第春飲食教誨視諸子甲申別構新屋於所居之西時子姪輩連歲婚娶遂與堂弟

立信分居先生曰故宅先人所居余所安弟可徙新宅鑿門於壁吾兄弟及諸子姪仍共飯共談笑無異曩時也先是族衆建宗祠以先生督工先生素持三志一為合族建祠二為族人之匱乏者捐贏餘以為調劑三為族人讀書不給者助以資使上進至是昕起晏歸宗祠成復酌盈劑虛使商事及族人無偏畸當丁丑戊寅大禋時先生嘗佐堂叔明經恪施賑復出家粟二屋以賙之無德色至是族鄰及鄰村稱厚德者皆首先生而以公款資給族人讀書事未成先生每引為歎督弟及子姪輩讀書延名師廣購書籍曰子弟讀一書閱一書有一書好處吾見人家覆敗子弟不肖者多不讀書能

讀書敗而不至於亡是可信者居則菽花樹手自灌溉身兼作僕鄉人有譽先生勤儉者先生曰勤則有矣儉猶未也又嗜朱子小學時瀏覽謂諸子弟曰此書嘉言懿行愈身體力行愈覺有味吾不敢為理學先生語汝曹勉之此中即有許多好先生好榜樣在也乙酉奉天商事虧折先生疾馳赴既為之布署一切身歷數處體察情形衆誚先生不即斷為徒勞先生不與辯再期利大盈衆乃無辭王學使廷相有友戍軍臺貧乏不自聊介學使致書先生乞貸先生慨給之又奉天有同鄉貧不能歸者給川資貧不能娶者助婚費與諸司號及傭保土民輩談笑樂易如平生旅戚及婢僕輩子弟

之聰穎者恆為之推薦商號使成立居鄉尚雍和諸妄少年見先生均肅然起敬鄉人共推先生充里正先生踵舊規外復察時宜定規章羣資法守丁酉夏子贊春得拔貢即先生子以嗣弟房者秋姪第春舉於鄉先生欣然曰二弟早逝今二子先後獲科名以慰二弟吾積年之願或稍紓乎旋疾卒年五十四歲先生豐頤廣顙健步善談與人交一以誠懇雖處富厚自奉甚儉約三族多賴以舉火鄉鄰有所乞貸無不予其卒也鄉人相顧出涕曰吾儕無福何使斯人長逝耶僧侶輩且有哭失聲者及葬不知名姓賻奠者有百餘率稱受先生之德云先生娶范氏能佐先生奉親課子先生恆在外

家人米鹽及詬誶勃谿一以寬恕處之皆得和好光緒乙酉先生以商事在外母篤疾不能歸范及姊賈事姑藥餌飲食衣不解帶者半年餘光緒壬寅子贊春旭春連舉鄉試先後報到范一如平時無少矜人皆服其意量之大乙巳族衆起女校請充堂監諸婦及女孫輩皆肅敬課事無嬉笑荒課者庚戌七十壽女生製幛以祝合衆翦綵為諸花果懸於庭鄉老人皆羨曰常氏族中賢婦百餘年來未聞見也甲寅卒年七十四歲夫史漢之自序叙傳有其例矣許叔重說文後序鄭康成自述並叙其家世即吾家道將著華陽國志既有序志自述而明張氏佳胤且補撰江原常氏士女志贊踵其制

不敢效唐姚氏思廉序其父與江總合傳於陳書致譏於世也若夫近年所見者有韓先生次郊纂洪洞志吳丈敬甫纂臨縣志李文簡齋纂昔陽志胡君瑞五纂太谷志均經印行劉君耀藜纂徐溝志尚未脫稿贊此寥寥者不敢苟同更何敢妄冀驂靳第感於陽曲縣志清道光二十二年後未之續修以號稱首善而致文獻無徵贊滋懼焉茲同人共圖付印則夫人事之變遷時勢之轉易後賢考核庶有依據云爾中華民國二十八年季秋之月常贊春識末

榆次縣志後序

志稿於二十六年粗成楊君季雯褚君子正王君仙槎王君
豫侯杜君理琴楊君漢臣閻生哲成家鑑堂等皆以為志乘
信今傳後不厭求詳乃綜合舊志詳為編錄務求精審又舊
志既不易得錢志僅有存者同治先緒諸志今雖尚可見而
書版全燬更錄諸傳分隸於今纂諸錄贊深恐天吳裋褐大
雅致譏同人謂舊存各志重印乏資似可略加訂正以為彙
存贊乃不敢仍執初見略為分合斷至民國二十六年俾與
所纂者稍符不敢效前輩之力求高簡為備省志之取裁然
事必徵信區區此忱尚可告吾邑明達也民國二十九年季

冬常贊春再識

重修榆次縣志序

吾榆重修縣志倡始於民國十年夏粗成於二十五年冬迨三十年秋而始付梓其間事變迭經幾致散佚所幸同志諸君本其初懷始終不懈始克戰勝艱難而卒底於成倘所謂有志竟成者歟建生也晚諸君子倡議之初方負笈并門未能躬與其盛厥後服務財教兩界案牘勞形日無暇晷對縣事興革益不遑過問歲己卯解組歸榆方幸仔肩得卸而諸君子乃猥以纂訂志稿事相屬時同志者為常君鑑堂楊君漢臣杜君理琴閻君哲成等九人而總纂則常君子襄也諸君子或為邑之先進或為當代賢豪建何人斯敢與斯役第

念縣志之因革關係邑之政治人文者至鉅吾榆二十年來戎馬倥傯兵差絡繹邑人士久已疲於奔命即此草創未終之續稿猶且屢經兵燹幾罹劫灰若不即早圖成文獻或將失攷建滋懼焉爰不揣謏陋取向所聞諸父老者為之訂殘補缺鎔新舊志於一爐而冶之嗣復徵得總纂同意易原稿之道里攷為交通學校攷為教育並增入宗教攷一門都為二十卷他如表式則刪繁就簡事蹟則崇實黜華皆商同諸君子慘澹經營而為之者纂修既畢將以問世建不禁重有感焉夫榆之民整肅而和藹榆之俗樸實而光華其故家遺俗流風善政之足以增光邑乘者固彪炳簡策後先輝映也

乃自歐風東漸民俗日漓舊日敦樸之風一變而為奢靡之
習洵致文教衰落民生凋敝是固世運之演變抑亦榆人墮
落之起點也故斯編所志雖仍山川風土都市職官之舊而
於有關國計民生之賦稅水利生計各攷特惓惓三致意焉
然則是志完成將籍以迴既倒之狂瀾固不僅孜孜焉圖保
存一邑文献已也故書之以示來者

中華民國三十年歲次辛巳秋節後五日邑人王建業謹序

修志始末記

民國二十八年冬常君鑑堂以舊縣志散佚續志未梓思欲整理鎔糅乃集邑中紳耆士秀而謀焉或曰方今萑苻遍地荆棘滿目死者狼籍藉生者呻吟不思所以拯之登之乃汲汲乎不急之務何為哉余惟方志之學隸在乙部國家政教風化所寄關係固甚重也以抱殘守缺之意備禮失諸野之求不其善乎况吾榆縣志創稿於明祭酒閻公梓成於宮保褚公其書非不詳且備焉顧歷時既久散佚無徵清康熙朝邑侯上谷劉公所纂修者則盡反舊志體例出以新裁馳騁詞翰忽略攷實土地戶口國本也不能詳其數物產賦稅國用

也不能舉其科邑人故稱劉志者亦如斷煤殘楮不獲窺其全豹乾隆朝邑侯震澤錢公之青因其例兩次修補均出邑人張天澤與王系先生手散治朝王公相圃仲坦復反劉錢志而另創新格惜仍未能脫其窠臼光緒初之續修亦僅記事實聊備後人之披擇而已民國十年春博山張公澄秋來尹榆次甫下車即以振興文教為己任乃集邑名宿成立修志局於曾公祠公舉常君紱章任總纂分纂采訪各量才而任之然以事非專司人多散處故歷時雖久所就甚微已而總纂病故事遂寢置越明年邑人士重申前議聘常君子襄繼任總纂不幸晉東軍興南北構釁旋作旋輟亦若天故厄

之者延至二十五年終僅以續志脫稿未及剗而丁丑變起今也舊版罹燬檔案散佚據此幸存之續稿糅合新舊而梓之則吾榆文獻或不至淪亡失寄而不足徵也於是商之總纂常君復聘王君仙槎豫侯楊君漢臣季雯杜君理琴游君劍岑褚君子正何君壽山等或纂輯或校讐或經理事務或測繪圖蹟不佞倭文亦以卑陋之質濫隨諸君子後而勉效微勞幸何如之顧草創甫就總纂常君遽爾捐館廢十數年之精力竟不獲觀厥成可哀也已憶志局成立之初任事者濟濟袞袞不下數十人類皆一時鴻儒碩彥曾幾何時及身而觀厥成者僅楊君漢臣季雯與常君曉樓耳掩卷思之能

無愴然是志也視原稿卷帙頗多而成功則速者實有賴於王君豫侯不休不眠之精神與諸君子同德同心之努力若夫校印則王君中孚陳君希聖任其勞焉明崇禎松江志有修志始末記清雍正江浦縣志首列志系攷文竊敢師其意述吾榆修志巔末如此時民國三十一年浴蘭節也鄉後學閻濬文謹識於申江旅次

跋

謹按吾邑縣志發起於民國十年張澄秋縣長任內始以體例變更采訪需時嗣以兵差絡繹供應連年局員改充差員局舍化為兵舍而總纂易人亦稽月日幾經停頓作輟靡常延至民國二十六年夏季始行脫稿又值中日事變不暇付梓近幸時局稍安往事重提同人等僉以舊志不^散失不全板亦殘缺商得總纂子襄先生同意融前志於一爐延請王君豫侯訂殘補缺楊君漢丞楊君季雯王君仙槎褚君子正杜君理琴閻君哲臣游君介臣郭君仲實何君壽山分工合作完成斯帙^余以老朽濫竽充數忝附驥尾當茲金融竭蹶工

榆次縣志

後序

常跋

十

料昂貴之際勉為付印不敢再延致負 諸君慘澹經營之苦心至於丁丑以後人事變遷新陳代謝諸待羅輯以截止在前不敢自亂其例概付缺如以俟後賢之賡續補修是則^余之所厚望焉民國三十年辛巳六月邑人常運藻附記